

OFFERYNNAU STATUDOL CYMRU

2011 Rhif 1588 (Cy.183)

TRAFFIG FFYRDD, CYMRU

Rheoliadau Personau Anabl (Bathodynnau ar gyfer Cerbydau Modur) (Cymru) (Diwygio) 2011

<i>Gwnaed</i>	-	-	-	-	<i>22 Mehefin 2011</i>
<i>Gosodwyd gerbron Cynulliad</i>					
<i>Cenedlaethol Cymru</i>	-	-			<i>29 Mehefin 2011</i>
<i>Yn dod i rym</i>	-	-			<i>1 Awst 2011</i>

Mae Gweinidogion Cymru, drwy arfer y pwerau a roddwyd i Gynulliad Cenedlaethol Cymru gan adran 21 o Ddeddf Cleifion Cronig a Phersonau Anabl 1970⁽¹⁾ ac a freinir bellach ynddynt hwy⁽²⁾, yn gwneud y Rheoliadau canlynol.

Enwi, cychwyn a chymhwyso

1.—(1) Enw'r Rheoliadau hyn yw Rheoliadau Personau Anabl (Bathodynnau ar gyfer Cerbydau Modur) (Cymru) (Diwygio) 2011 a deuant i rym ar 1 Awst 2011.

(2) Mae'r Rheoliadau hyn yn gymwys o ran Cymru.

Rhagarweiniol

2. Diwygir Rheoliadau Personau Anabl (Bathodynnau ar gyfer Cerbydau Modur) (Cymru) 2000⁽³⁾ fel a ganlyn.

Dehongli Rheoliadau 2000

3.—(1) Diwygir rheoliad 2(1) fel a ganlyn—

- (i) hepgorer y diffiniad o “Rheoliadau 1982”
- (ii) yn y diffiniad o “person anabl” hepgorer y geiriau “dros ddwy flwydd oed”;
- (iii) yn nhestun Saesneg y diffiniad o “holder”, yn lle “institution” rhodder “organisation”;
- (iv) yn y testun Saesneg, hepgorer y diffiniadau o “institution” ac “institutional badge”;
- (v) yn y testun Saesneg, yn union ar ôl y diffiniad o “issuing authority”, hepgorer y gair “and”;

(1) 1970 p.44

(2) Trosglwyddwyd pwerau Cynulliad Cenedlaethol Cymru o dan adran 21 o Ddeddf Cleifion Cronig a Phersonau Anabl 1970 i Weinidogion Cymru yn rhinwedd paragraff 30 o Atodlen 11 i [Ddeddf Llywodraeth Cymru 2006 \(p.32\)](#)

(3) [OS 2000/1786 \(Cy.123\)](#)

(vi) yn y testun Saesneg, ar ôl y diffiniad o “local authority”, mewnosoder—

““organisation” (“*sefydliad*”) means an organisation concerned with the care of disabled persons to which a disabled person’s badge may be issued in accordance with section 21(4) of the 1970 Act; and

“organisational badge” (“*bathodyn sefydliad*”) means a disabled person’s badge issued to an organisation.”

Dirymu darpariaethau darfodedig o Reoliadau 2000

4.—(1) Diwygir rheoliad 3 fel a ganlyn.

(2) Hepgorer paragraffau (1) a (2).

(3) Newidier y pennawd yn unol â hynny i “Darpariaeth drosiannol”.

Disgrifiadau o bersonau anabl

5.—(1) Diwygir rheoliad 4 fel a ganlyn.

(2) Yn lle paragraff (1) rhodder—

“(1) Y disgrifiadau rhagnodedig o berson anabl y caniateir rhoi bathodyn person anabl iddo yw—

(a) person dros 3 blwydd oed sy'n dod o fewn un neu ragor o'r disgrifiadau a bennir ym mharagraff (2);

(b) person nad yw dros 3 blwydd oed sy'n dod o fewn y naill neu'r llall neu'r ddau o'r disgrifiadau a bennir ym mharagraff (3).”

(3) Ym mharagraff (2)—

(a) Ar ôl “disgrifiadau” mewnosoder “y cyfeirir atynt ym mharagraff (1)(a)”;

(b) Yn is-baragraff (b)—

(i) hepgorer y geiriau “defnyddio cerbyd modur a ddarparwyd gan yr Adran Nawdd Cymdeithasol neu Weithrediaeth yr Alban neu sy'n”; a

(ii) yn lle “ag adran 5(2)(a) o Ddeddf y Gwasanaeth Iechyd Gwladol 1977”, rhodder “â pharagraff 10(3) o Atodlen 1 i Ddeddf y Gwasanaeth Iechyd Gwladol 2006(4) a pharagraff 10(3) o Atodlen 1 i Ddeddf y Gwasanaeth Iechyd Gwladol (Cymru) 2006(5)”;

(c) ar ôl paragraff (2)(ch) mewnosoder—

“(ch2) wedi—

(i) cael budd-dal cyfandaliad o dan erthygl 15(1)(a) o Orchymyn y Lluoedd Arfog a'r Lluoedd wrth Gefn (Cynllun Iawndal) 2011(6) o fewn y lefelau tariff 1 i 8 (yn gynwysedig); a

(ii) wedi ei ardystio gan yr Ysgrifennydd Gwladol fel un sydd ag anabledd parhaol a sylweddol sy'n achosi anallu i gerdded neu anhawster cerdded sylweddol iawn;”.

(ch) yn lle is-baragraff (d) rhodder—

(4) 2006 p.41
 (5) 2006 p.42
 (6) OS 2011/517

“(d) yn gyrru cerbyd modur yn rheolaidd; sydd ag anabledd difrifol i'w ddwy fraich ac yn analluog i weithredu, neu'n cael anhawster sylweddol i weithredu, pob math neu rai mathau o feter parcio.”.

(4) Ar ôl paragraff (2) mewnosoder y paragraffau canlynol—

“(3) Y disgrifiadau y cyfeirir atynt ym mharagraff (1)(b) yw—

- (a) plentyn y mae'n rhaid iddo bob amser, oherwydd ei gyflwr, fynd ag offer meddygol swmpus gydag ef, na ellir ei gludo o amgylch gyda'r plentyn heb beri anhawster mawr;
- (b) plentyn y mae'n rhaid iddo bob amser, oherwydd ei gyflwr, gael ei gadw'n agos at gerbyd modur er mwyn rhoi triniaeth ar gyfer y cyflwr hwnnw pe bai angen, naill ai yn y cerbyd neu drwy gludo'r plentyn yn gyflym yn y cerbyd i fan lle y gellir rhoi triniaeth o'r fath.

(4) Yn y rheoliad hwn—

- (a) mae “offer meddygol swmpus” (“*bulky medical equipment*”) yn cynnwys yn benodol unrhyw un o'r canlynol—
 - (i) peiriannau anadlu;
 - (ii) peiriannau sugno;
 - (iii) pypiau bwydo;
 - (iv) offer parenterol;
 - (v) gyrwyr chwistrelli;
 - (vi) offer gweini ocsigen;
 - (vii) offer ar gyfer monitro dirlawnder ocsigen parhaus; ac
 - (viii) castiau a chyfarpar meddygol cysylltiedig ar gyfer cywiro dysplasia'r glun.
- (b) mae i “meter parcio” (“*parking meter*”) yr ystyr a roddir i “parking meter” yn Neddf Rheoleiddio Traffig Ffyrdd 1984(7) (gweler adrannau 46(2)(a) a 142(1)).”

Bathodynnau sefydliad

6. Yn lle rheoliad 5 o'r testun Saesneg, rhodder—

“5 Organisational badges

An organisational badge may be issued to an organisation for a motor vehicle which is to be used to carry disabled persons falling within one or more of the descriptions specified in regulation 4(2) or (3).”

Cyfnod rhoi bathodyn

7. Yn lle rheoliad 6(2) rhodder—

“(2) Yn ddarostyngedig i reoliadau 7(2) a 9, rhoddir bathodyn person anabl—

- (a) i berson sy'n dod o fewn y disgrifiad a bennir yn rheoliad 4(1)(b), am gyfnod sy'n diweddu ar y diwrnod yn union ar ôl trydydd pen-blwydd y person hwnnw;
- (b) i berson sy'n dod o fewn y disgrifiad a bennir yn rheoliad 4(2)(a) neu 4(2)(ch), am ba un bynnag yw'r byrraf o'r canlynol—
 - (i) y cyfnod o dair blynedd sy'n dechrau gyda'r dyddiad rhoi; neu

- (ii) y cyfnod sy'n dechrau gyda'r dyddiad rhoi ac yn dod i ben ar y dyddiad y bydd y person hwnnw'n peidio â chael cyfradd uwch cydran symudedd y lwfans byw i'r anabl neu'r atodiad symudedd;
- (c) i berson nad yw'n dod o fewn is-baragraff (a) neu (b), am gyfnod o 3 blynedd sy'n dechrau gyda'r dyddiad rhoi."

Seiliau dros wrthod rhoi bathodyn

8. Yn rheoliad 8(2)(b)(ii) o'r testun Saesneg, yn lle "institution" yn y ddau fan y mae'n digwydd rhodder "organisation".

Dychwelyd bathodyn i'r awdurdod rhoi

9. Yn rheoliad 9(1) o'r testun Saesneg—

- (a) yn lle "institutional" yn y ddau fan y mae'n digwydd, rhodder "organisational"; a
- (b) yn lle "institution" yn y ddau fan y mae'n digwydd, rhodder "organisation".

Ffurf bathodyn

10.—(1) Yn rheoliad 11(a)(ii) o'r testun Saesneg, yn lle "institutional" rhodder "organisational".

(2) Yn y testun Saesneg, yn lle Rhan II o'r Atodlen i Reoliadau 2000, rhodder y Rhan II a ddangosir yn yr Atodlen i'r Rheoliadau hyn.

(3) Nid oes dim yn y rheoliad hwn sy'n effeithio ar ddilysrwydd bathodyn—

- (a) a roddwyd cyn bo'r Rheoliadau hyn wedi dod i rym; a
- (b) a oedd mewn ffurf a oedd yn cydymffurfio â Rheoliadau 2000 ar yr adeg y'i rhoddwyd.

Arddangos bathodyn sefydliad

11.—(1) Yn nhestun Saesneg rheoliadau 15 ac 16, yn lle "institutional" ym mhob man y mae'n digwydd, rhodder "organisational".

(2) Yn unol â hynny, yn y testun Saesneg, newidier pennawd rheoliad 15 i "Display of an organisational badge when a vehicle is being driven" a phennawd rheoliad 16 i "Display of an organisational badge when a vehicle is parked".

22 Mehefin 2011

Carl Sargeant
Y Gweinidog Llywodraeth Leol a Chymunedau,
un o Weinidogion Cymru

Statws *This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.*

YR ATODLEN

Rheoliad 10

FFURF BATHODYN — DIAGRAMAU AMNEWIDIOL

RHAN II

FFURF BATHODYN SEFYDLIAD

Statws This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

<p>Date of expiry: Dyddiad y daw i ben:</p>	<p>Parking Card for people with disabilities Cerdyn Parcio pobl ag anableddau</p> <p>Parkeringskort Κάρτα στάθμευσης Tarjeta de estacionamiento Parkausweis Contrassegno di parcheggio Parkeerkaart Cartão de estacionamento Pysäköntilupa Parkeringstillstånd Carte de stationnement</p>
<p>Issued by: Rhoddwyd gan:</p>	
<p>Serial No: Rhif Cyfresol:</p>	
 <p>ORGANISATIONAL BADGE BATHODYN SEFYDLIAD</p>	 <p>EUROPEAN COMMUNITIES MODEL MODEL Y CYMUNEDAU EWRO- PEAIDD</p>

<p>Stamp or logo of organisation Stamp neu logo'r sefydliad</p>	<p>This card entitles the holder to the special local parking facilities available in the Member State concerned.</p> <p>When in use, the card is to be displayed at the front of the vehicle in such a way that the front of the card is clearly visible for checking purposes.</p> <p>Mae'r cerdyn hwn yn rhoi hawl i'r deiliad ddefnyddio'r cyfleusterau parcio lleol arbennig sydd ar gael yn yr Aelod-Wladwriaeth o dan sylw.</p> <p>Wrth ei ddefnyddio, rhaid dangos y cerdyn ym mhen blaen y cerbyd fel bod blaen y cerdyn i'w weld yn glir i gael ei archwilio.</p>
<p>Name of organisation: Enw'r sefydliad:</p>	<p>MISUSE OF THIS CARD MAY CONSTITUTE A CRIMINAL OFFENCE</p> <p>GALL CAMDDEFNYDDIO'R CERDYN HWN FOD YN DRAMGWYDD TROSEDDOL</p>

© Crown copyright 2009
Published by The Stationery Office on behalf of The National Assembly for Wales
Printed in the UK. N5867260 C6 06/08
© Hawthorn y Goron 2009
Cyhoeddwyd gan y Llyfrfa ar ran Cynulliad Cenedlaethol Cymru.
Argraffwyd yn y D.U. N5867260 C6 06/08

EXPLANATORY NOTE

(Nid yw'r nodyn hwn yn rhan o'r Rheoliadau)

Diben y Rheoliadau hyn yw diwygio Rheoliadau Personau Anabl (Bathodynau ar gyfer Cerbydau Modur) (Cymru) 2000 ([OS 2000/1786 \(Cy.123\)](#)) ("Rheoliadau 2000"). Mae'r Rheoliadau hynny (ynghyd â Rheoliadau perthynol sy'n ymwneud ag esemptiadau ar gyfer personau anabl) yn gwneud darpariaeth ar gyfer system o fathodynau glas i bersonau anabl o Gymru, a fydd yn ddilys ledled yr Undeb Ewropeaidd.

Mae rheoliad 3 yn diwygio testun Saesneg rheoliad 2 o Reoliadau 2000 drwy roi diffiniadau o "organisation" ac "organisational badge" yn lle'r diffiniadau o "institution" ac "institutional badge". Mae'r newid enwau hwn yn tarddu o ddiwygiad i adran 21(4) o Ddeddf Cleifion Cronig a Phersonau Anabl 1970, a wnaed gan baragraff 41 o Atodlen 1 i Ddeddf Gwahaniaethu ar sail Anabledd 2005. Gwneir diwygiadau canlyniadol eraill, sy'n tarddu o'r paragraff hwnnw, i destun Saesneg Rheoliadau 2000 gan reoliadau 6, 8, 9, 10 ac 11 o'r Rheoliadau hyn. Nid oes angen diwygiadau cyfatebol yn y testun Cymraeg oherwydd bod y gair "sefydliad", a ddefnyddir yn y testun Cymraeg, yn cyflew "organisation" yn ogystal ag "institution".

Mae rheoliad 4 yn dirymu darpariaethau darfodedig yn rheoliad 3 o Reoliadau 2000.

Mae rheoliad 5 yn addasu'r disgrifiad, a bennir yn rheoliad 4 o Reoliadau 2000, o bersonau y ceir rhoi bathodyn person anabl iddynt.

Mewnosodir dosbarth cymhwystra newydd, sy'n cynnwys plant o dan 3 oed sy'n dod o fewn y naill neu'r llall neu'r ddau o'r disgrifiadau a bennir yn y rheoliad 4(3) a fewnosodir. Ehangir y disgrifiad sy'n cynnwys pobl ag anabledd difrifol i'w dwy fraich.

Mae rheoliad 5 hefyd yn diwygio'r disgrifiad o bersonau y ceir rhoi bathodyn person anabl iddynt drwy gynnwys rhai sy'n cael budd-dal penodedig o dan Orchymyn y Lluoedd Arfog a'r Lluoedd wrth Gefn (Cynllun Iawndal) 2011 ([OS 2011/517](#)) ac yr ardystir bod ganddynt anabledd parhaol a sylweddol sy'n achosi anallu i gerdded neu anhawster cerdded sylweddol iawn.

Mae rheoliad 7 yn rhoi paragraff newydd yn lle rheoliad 6(2) o Reoliadau 2000, i ddarparu bod bathodynau i'w rhoi am gyfnodau a ddaw i ben yn union ar ôl trydydd pen-blwydd y plentyn, yn achos bathodynau a roddir i blant o dan dair blwydd oed; ac ar y dyddiad y peidia'r lwfans (os yw'r cyfnod yn llai na thair blynedd) yn achos personau sy'n cael lwfansau penodedig.

Mae rheoliad 10 a'r Atodlen yn diwygio testun Saesneg yr Atodlen i Reoliadau 2000, drwy roi diagram newydd, sy'n cynnwys y newid enwau, yn lle'r diagram o fathodyn sefydliad.

Mae asesiad rheoleiddiol llawn o effaith y diwygiadau ar gostau busnesau a'r sector gwirfoddol ar gael o'r Uned Trafnidiaeth Integredig, Llywodraeth Cynulliad Cymru, Parc Cathays, Caerdydd, CF10 3NQ.